

Home > PEIROL > EDIZIONE > Coras que·m fezes dolor > Edizioni

---

## Edizioni

- letto 836 volte

### Aston

Coras que·m fezes dolor  
Amors, ni·m dones esmai,  
ara·m ten jauzen e gai,  
per qu'ieu chan a mon plazer.  
Qu'ieu ai plus ric joi conquis  
qu'a mi no·s taignia;  
e quan ricors s'umilia,  
humilitatz s'enriquis.

Midons mercei e grazis  
la benanansa q'ieu ai,  
e ja non oblidarai  
los plazers que·m fes ni·m dis;  
qu'en mi non a mais poder  
cil c'amar solia,  
qu'en plus franca seignoria  
vuoill ses engan remaner.

Derenan m'er a tener  
al reprovier qu'om retrai;  
?No·s mova qui ben estai?.  
Non farai eu ges per ver!  
Qe·l flama qu'amors noiris  
m'art la nuoich e·l dia,  
per qu'ieu devenc tota via  
cum fai l'aurz el fuoc plus fis.

Be m'agrad' e m'abelhis  
de dos amicx, quan s'eschai  
que s'amon de cor verai  
e l'us l'autre non traïs,  
e sabon luoc e lezer  
gardar ses folia  
que lor bona compaignia  
non puosc' enojos saber.

Soven l'anera vezer,  
la plus avinen q'ieu sai,  
si·l devinamen qu'om fai  
no m'avengues a temer.  
Pero mos cors es aclis  
vas lieis on qu'il sia,  
que fin'amors joing e lia  
tals que part loindans pais.

S'era part la crotz dels ris,  
don anc hom non tornet sai,  
non crezatz que·m pogues lai  
retener nuills paradis.  
Tant ai assis mon voler  
en ma douss'amia  
que senes lieis non poiria  
negun autre joi aver.

Chansos, oimais potz tener  
vas midons ta via,  
qu'ieu sai ben qu'ella volria  
te auzir e mi vezter.

Dalfi, s'auzes mon voler  
dir' a ren que sia,  
tant am vostra seignoria  
que vos en saubratz lo ver.

- letto 606 volte

## Milonia

Traduzione

- letto 932 volte